



Barnaheill

Save the Children Iceland

Nefndasvið Alþingis
b.t. Selmu Hafliðadóttur
Austurstræti 8-10
150 Reykjavík

Reykjavík, 7. desember 2007

Umsögn um: Frumvarp til laga um breytingu á alm.hgl, 184 mál, upptaka eigna, hryðjuverk, mansal o.fl.

Þessi umsögn Barnaheilla lýtur aðeins að því sem viðkemur mansali í ofangreindu frumvarpi.

Barnaheill – Save the Children á Íslandi fagna þeim breytingum sem höfundar frumvarpsins boða í frumvarpinu um mansal. Samtökin telja að samþykkt þess yrði stórt skref í rétta átt í baráttunni gegn mansali sem allir geta verið sammála um að ógni mannréttindum og grundvallargildum í lýðræðisþjóðfélögum.

Barnaheill fagna sérstaklega þeirri viðbót við refsíákvæðið gegn mansali (227. gr. a almennra hegningarlaga sem lögfest var með lögum nr. 40/2003) að ef brot beinist gegn barni skal taka það sérstaklega til greina til þyngingar refsingunni þegar refsíákvörðun er tekin. Barnaheill styðja allar þær breytingar á gildandi mansalsákvæði hegningarlaga sem taldar eru upp í frumvarpinu.

Barnaheill fagna því einnig að leitast sé við að endurskoða gildandi ákvæði almennra hegningarlaga með það í huga að fullgilda samning Sameinuðu þjóðanna gegn fjölþjóðlegri, skipulagðri brotastarfsemi (Palermó-samninginn) frá 15. nóvember 2000 og bókun við þann samning um að koma í veg fyrir, berjast gegn og refsa fyrir verslun með fólk, einkum konur og börn.

Einnig fagna Barnaheill því að verið sé að gera nauðsynlegar ráðstafanir til að hægt sé að fullgilda Evrópuráðssamning um aðgerðir gegn mansali frá 3. maí 2005. Í frumvarpinu segir að gera verður þann fyrirvara varðandi fullgildingu þess samnings að hann kunni að kalla á aðrar lagabreytingar svo unnt verði að fullgilda hann. Barnaheill þrýsta á að allar frekari lagabreytingar sem taldar verða nauðsynlegar til að hægt verði að fullgilda samninginn, verði gerðar.

Þess má geta að einn af vinnuhópum Evrópuhóps Barnaheilla berst gegn mansali á börnum. Evrópuhópurinn leggur áherslu á að það sem barni er fyrir bestu skal ávallt haft að leiðarljósi þegar tekið er á mansali þar sem börn eiga í hlut. Staða barnsins sem innflytjanda ætti í þessu sambandi ekki að verða aðalatriðið.

Evrópuhópur Barnaheilla leggur áherslu á að börn sem orðið hafa fyrir mansali fái áfallahjálp og aðhlyningu og aðgang að allri þjónustu ss. félagsþjónustu, heilbrigðisþjónustu og skólagöngu. Börnin fái einnig tilsjónarmann meðan á ferlinu stendur. Hafa þarf upp á fjölskyldu barnsins, án þess að barninu eða fjölskyldunni verði stefnt í hættu. Mikilvægt er að barnið verði einungis sent til síns heima ef aðstæður þar eru öruggar.

Evrópuhópur Barnaheilla leggur einnig áherslu á að mikilvægt sé að barnið sé upplýst og að það sé haft með í ráðum en verði aldrei gert ábyrgt fyrir þeim aðstæðum sem það hefur lent í, né heldur fyrir ákvarðanatöku og lausn mála. Evrópuhópurinn leggur mikla áherslu á



Barnaheill

Save the Children Iceland

samvinnu stjórnvalda, alþjóðastofnana og frjálsra félagasamtaka í hverju landi fyrir sig í mótun stefnu og verklagsreglna um þessi mál og að meginábyrgðin liggi hjá ríkisvaldinu. Hlutverk sveitarfélaga, foreldra og annara sem annast börn er einnig afar mikilvægt sem og samvinna lögregluþyrvalda, barnaverndaryfirvalda og dómskerfisins.

Barnaheill vilja einnig minna á þá grundvallarreglu barnaréttarins og Barnasáttmála Sameinuðu þjóðanna að ávallt beri að hafa hag og þarfir barnsins að leiðarljósi þegar málefni þess eru ráðin, sama hver þau eru, og á það að sjálfsögðu einnig við í þessum málum. Samtökin vilja því ítreka hér hvatningu sína til stjórnvalda um lögfestingu Barnasáttmálans og vísa í umsögn sína um lögfestingu samnings Sameinuðu þjóðanna um réttindi barnsins, nr. 18, 2. nóv. 1992. (7. mál.) sem þau sendu inn þann 16. nóvember síðastliðinn.

Virðingafyllst,

Petrína Ásgeirsdóttir,
framkvæmdastjóri Barnaheilla.



Barnaheill

Save the Children Iceland